



11. februar 2014

UPA 2014/67

Inatsisartut suleriaasianni § 36 naapertorlugu aalajangiiffigisassatut siunnersuut imaattoq matumuuna saqqummiupparput:

Inuusuttut suliffissaaleqinermik eqqugaasimasut aammalu allat suliffissaaleqinermik eqqugaasimasut pisortanit ikiorsiissutinik siunissami pisinnaanissaminnut tunngaviumik pisinnaatitaaffigisassa at aammalu pisussaaffigisassa at suusinnaanersut pillugit apeqquteqaat aalaavigalugu oqallisissiaq

(Inatsisartuni ilaasortat Knud Kristiansen aamma Gerhardt Petersen, Atassut)

Tunngavilersuut:

Kalaallit Nunatsinni suliffissaaleqinerup akiorniarneqarneranut atatillugu inuiaqatigiittut imaannaanngitsumik unammilligassaqpugut, innuttaqassutsimummi sanilliullugu inuiaqatigiarrannguuvugut, taamaammallu innuttaasunut sulisinnaasunut sanilliullugu akornatsinni innuttaaqatigut suliffeqalissutigisinnaasaminnik ilinniarsimanngitsut taamaalillutillu suliffissaaleqinermik eqqugaanissaminnut aarlerinartorsiorfimmittut taamak amerlatigitillugit inuiaqatigiittut misikkarissorujussuuvugut.

Sapinngisamik amerlanerpaat ilinniakkamik ingerlatsillutillu naammassinninnissaat siunertaralugu aammalu suliffissaaleqinermik eqqugaasimasut ikilisarneqarnissaat siunertaralugu piffissap ingerlanerani siunertat iliutsillu pitsaasut ingerlaavartumik ingerlanneqarput, taamaattorli suliffissaaleqisut amerliartortarnerannut pakkersimaarutitut naammassimanngitsut soorluuna paasinarsiartuinnartoq, taamaammatt ajornartorsiut nutaamik nalilersussallugu piffissanngorpoq ataatsimoorlutalu anguniagaqarluta oqaloqatigiinnissarput pisariaqarpoq oqaloqatigiinnerullu malitsigisaanik sapinngisamik timitalimmik iliuuseqartariaqarput.

Assersuutitut matumani saqqummiutissavarput suliffissaaleqinermik eqqugaasimasut pillugit Nunatta Naatsorsueqqissaartarfiata saqqummiussai kisitsisit kingulliit december 2013-mut tunngasut.



- Suliffissarsiortut 3.960-iupput, taakkunannga angutit amerlanersaallutik, angutit 2.311-iugamik arnat 1.649-sut.
- Suliffissarsiortunit 3.960-iusunit inuusuttut 18-it 30-illu akornanni ukiullit 1.352-iupput, tassa nalunaarsorneqarsimasunit 34 procent-it inuusuttuupput ukiumikkut ilinniakkamik ingerlatsinissaminnut naleqquttut.

Suna nassuaatissaava inuusuttut suliffissarsiortut taamak amerlatiginerannut? Sooq ilinniakkamik ingerlataqanngillat? Ilaqutaasutut qanoq iliorsinnaavugut? Innuttaaqatigiit qanitareqatigiittut qanoq iliorsinnaavugut? Inuiaqatigiittut ataatsimut qanoq iliorsinnaavugut? Minnerunngitsumillu naalackersuineramik suliaqartugut uagut qanoq iliorsinnaavugut?

ATASSUT-mit pingaartittuarparput sulineq akilersinnaanerujuaannassasoq taamaammallu sulisinnaasunik pisortat pilersuinerat minnerpaatinneqartariaqartoq, siunertarerpjarlugu amerlanerpaat ilinnialernissaat imaluunniit aalajangersimasumik suliffeqalernissaat taamaalillunilu pisortanit isumagineqarnermik isumalluuteqaannalersoortoqarnissaa pinngitsoortinniarneqassasoq.

Taamaattorli suliffissaaleqineramik eqqugaasimasut suna alla toqqagassarisaarpaat? Qularutiginnigilarpummi suliffissaaleqisut akornanni amerlanerpaat aalajangersimasumik suliffeqarusukkaluartut taamaalillutillu imminnut pilersornissaminnut pisussaaffimminnik naammassinnissinaalerlutik ilaqaqalersimagunillu ilaqtaminnut pilersuisinnaalerlutik inississagamik.

Aaqqiissutit ilagisinnaanerpaat suliffissaaleqisut ukiuinut agguarlugit immikkut iliuuseqarfigineqartalernissaat, taamaalillunilu inuusuttut suliffissaaleqisut inatsisitigut toqqammavilimmik ilinniagaqalernissaannut piumaffigineqalernissaat tunngavissinneqarluni? Aaqqiissutit ilagisinnaanerpaat Namminersorlutik Oqartussat Nunatsinni Kommunit suleqatigalugit suliffissaaleqinerup nalaani suliaqartussaataitanermik pisussaaffiliineq, taamaalillunilu aalajangersimasumik suliffeqalernissamut qanillisaataasumik? Nunanit allanit nunatsinnut tikisillugit suliaqartit pillugit sukannernerusumik piumasaqaateqartariaqarnerluta?



ATASSUT INATSISARTUNI

ATASSUT-mit isumaqarpugut apeqqutit kingulliit immikkut ataatsimoortumillu sukumiisumik nalilersortariaqarigut aammalu suliffissaaleqinerup akiorniarneqarneranut atatillugu pimoorussamik isumaqatigiinniarnissamut toqqammavissarsiortariaqartugut.

Tamakku tunngavilersuutigalugit matumuuna apeqquteqaat aallaavigalugu oqallisissiaq ilissinnut isaapparput.